

Cuoira, ils 2 da lügl 2024

Comunicaziun a las medias

Cuors intensivs da vallader a Scuol

Eir quist on cun bleras annunzchas ed ün program cultural public

Dals 22 als 26 lügl 2024 spordscha la Lia Rumantscha per incumbenza da l'Uniun dals Grischs cuors intensivs da vallader a Scuol. Quists cuors pussibilteschan a tuot las personas interessadas d'imprender, d'ameglrar o da perfecziunar la lingua discurrüda e scritta in Engiadina Bassa e da tilla dovrar activmaing. Eir quist on cun ün program cultural public, per part in collavuraziun cun la Biosfera UNESCO Engiadina Val Müstair, e darcheu cun bleras annunzchas.

Cun var 150 annunzchas as conferma il grond interess cha'ls cuors intensivs da vallader svaglian cun üna partecipaziun listess ota sco l'on passà. In tuot daja 14 differents cuors – da cuors classics chi correspuondan als differents levels dal cudesch d'instrucziun «In lingua directa» e cuors da conversaziun per personas avanzadas, ma eir principiantas, fin ad ün cuors da litteratura. Sper ils cuors intensivs in classa da l'avantmezdi vegn sport l'uschè nomnä chant avert avant cha las lecziuns cumainzan.

Ultra da quai survegnan las partecipantas ed ils partecipants ün'invista illa cultura rumantscha, in special in quella ladina. Quai nu capita be illas lecziuns in classa, dimpersè eir d'ürant il program accumpagnant cultural facultativ. El as cumpuona da referats, da guidas, lavuratoris e da contacts cun personas rumantschas. Quist on cun ün davomezdi organisà insembel culla Biosfera UNESCO Engiadina Val Müstair.

Occurrenz publicas per üna e scodüna

Eir quist on es l'access ad üna part da quist program cultural avert eir al public interessà. Dimena pussibilitats per star da cumpagnia ed as barattar in rumantsch – tant per indigenas ed indigens sco eir per personas chi imprendan la lingua. L'entrada a las occurrenz es libra.

Las seguaintas occurrenz sun publicas:

- Preschantaziun da la nouva Chasa Paterna: l'autura Olga Prevost preschainta ils raquints e las poesias, Fadrina Hofmann maina tras la saira.
lündeschdi, ils 22-7-2024 a las 17.45 i'l Local da cultura dal BES a Scuol
L'occurrenza vain organisada in collavuraziun cun *l'Uniun dals Grischs*.
- Concert: FÖ, AUA, TERRA, AJER: Michael Mahnig suna i'l rom da la fila da concerts «SENT HA ALAS» sül clavazin a cua da Stainway.
mardi, ils 23-7-2024 a las 17.00 illa baselgia San Lurench a Sent
L'occurrenza vain organisada in collavuraziun cun *Concerts illa baselgia da Sent*.



- Cafè rumantsch extra muros: l'istoriker local Tumasch Planta preschainta las lavurs e perscrutaziuns da la famiglia Planta in connex cun veglias vias in Engiadina Bassa e seis cudesch «Alte Talwege im Unterengadin». gövgia, ils 25-7-2024 a las 10.30 in sala cumünala a Scuol
- Prelecziun litterara: Mevina Puorger preschainta insembel cul autur Jachen Andry sia raccolta quadrilingua «fil-filo-fil-faden», sco eir «chartas al giat», sia traducziun dad ün'ouvra dad Antoinette Rychner, ün'autura romanda. gövgia, ils 25-7-2024 a las 17.45 i'l Local da cultura dal BES a Scuol
L'occurrenza vain organisada in collavuraziun cun *editionmevinapuorger*.

Ils cuors intensivs da vallader han lö dals 22 als 26 lügl 2024 a Scuol. In october, dals 7 als 11, seguan lura ils cuors intensivs da vallader a Müstair. Respunsabel per l'organisaziun dals cuors ed il program accompagnant es Linard Martinelli, manader fuormaziun da la Lia Rumantscha.